

CBETA電子佛典集成

CBETA Chinese Electronic Tripitaka Collection
eBook

T21n1299

文殊師利菩薩及諸 仙所說吉凶時日善 惡宿曜經

唐 不空譯

目次

- [編輯說明](#)
- [章節目次](#)
 - [1_序分定宿直品](#)
 - [2_序日宿直所生品](#)
 - [3_序三九祕宿品](#)
 - [4_序七曜直日品](#)
 - [5_祕密雜占品](#)
 - [6_序黑白月分品](#)
 - [7_序日名善惡品](#)
 - [擇日](#)
 - [擇時](#)
 - [白黑月所宜吉凶曆](#)
 - [二十七宿所為吉凶曆](#)
 - [行動禁閉法](#)
 - [裁縫衣裳服著用宿法](#)
 - [三必祕要法](#)
 - [8_七曜直日曆品](#)
 - [七曜占](#)
 - [太陽直日](#)
 - [大陰直日](#)
 - [熒惑直日](#)
 - [辰星直日](#)
 - [歲星直日](#)
 - [太白直日](#)
 - [鎮星直日](#)
 - [七曜直日與二十七宿合吉凶日曆](#)
 - [釋太白所在八方天上地下吉凶法](#)
- [卷目次](#)
 - 001,
 - 002
- [贊助資訊](#)

編輯說明

- 本電子書以「CBETA 電子佛典集成 Version 2023.Q4」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

No. 1299

文殊師利菩薩及諸仙所說吉凶時日善惡宿曜經卷上

開府儀同三司特進試鴻臚卿肅國公食邑三千戶賜紫贈司空謚大監正
號大廣智大興善寺三藏沙門不空奉 詔譯

弟子上都草澤揚景風修注

和上以乾元二年翻出此本，端州司馬史瑤執受纂集，不能品序，使文義煩猥，恐學者難用，於是草澤弟子揚景風，親承和上指揮，更為修注，筆削以了繕寫奉行，凡是門人各持一本。于時歲次玄枵大唐廣德之二年也。

宿曜曆經序分定宿直品第一

天地初建，寒暑之精化為日月，烏兔抗衡生成萬物，分宿設宮管標群品。日理陽位，從星宿順行，取張、翼、軫、角、亢、氐、房、心、尾、箕、斗、牛、女等一十三宿，迄至于虛宿之半，恰當子地之中，分為六宮也。但日月天子俱以五星為臣佐，而日光炎猛，物類相感，以陽獸師子為宮神也。月光清涼，物類相感，以陰虫巨蟹為宮神也。

又日性剛義、月性柔惠，義以濟下、惠以及臣，而日月亦各以神宮均賜。五星以速至遲，即辰星、太白、熒惑、歲鎮排為次第，行度緩急於斯彰焉。凡十二宮，即七曜之躔次，每歷示禍福經緯災祥。又諸宮各有神形，以彰宮之象也。又一宮配管列宿九足，而一切庶類相感。

月廣五十由旬，得繫命以京吉凶，大體屬於日月。

日廣五十一由旬風精，太白廣十由旬空精，歲星廣九由旬月精，辰宿廣八由旬火精，熒惑廣七由旬日精，土星廣六由旬，星宿小者廣一俱盧舍。

日宮下面頗梨之寶，火精之質也，溫舒能照百物。月宮下面琉璃之寶，清涼能照萬物。日月諸曜，眾生業置於空中，乘風而止，當須彌之半，踰健陀羅之上，運行於二十七宿十二宮焉。宮宿之分今具說之，更為圖書耳。

第一、星四足，張四足，翼一足，大陽位焉。其神如師子，故名師子宮。主加官得財事。若人生屬此宮者，法合足精神、富貴孝順，合掌握軍旅之任也。

第二、翼三足，軫四足，角二足，辰星位焉。其神如女，故名女宮。主妻妾婦人之事。若人生屬此宮者，法合難得心腹，多男女、足錢財、高職，故合掌宮房之任。

第三、角二足，亢四足，氏三足，太白位焉。其神如秤，故名秤宮。主寶庫之事。若人生屬此宮者，法合心直平政、信敬多財，合掌庫藏之任。

第四、氏一足，房四足，心四足，熒惑位焉。其神如蝎，故名蝎宮。主多病剋禁分身之事。若人生屬此宮者，法合饒病薄相惡心妬忌，合掌病患之任。

第五、尾四足，箕四足，斗一足，歲星位焉。其神如弓，故名弓宮。主喜慶得財之事。若人生屬此宮者，法合多計策足心謀，合掌將相之任。

第六、斗三足，女四足，虛二足，鎮星位焉。其神如磨竭，故名磨竭宮。主鬪諍之事。若人生屬此宮者，法合心鹿五逆、不敬妻子，合掌刑殺之任。

右已上六位，總屬太陽分。已下六位，總屬大陰分。

第七、虛二足，危四足，室三足，鎮星位焉。其神如瓶，故名瓶宮。主勝彊之事。若人生屬此宮者，法合好行忠信、足學問富饒，合掌學館之任。

第八、室一足，壁四足，奎四足，歲星位焉。其神如魚，故名魚宮。主加官受職之事。若人生屬此宮者，法合作將相無失，脫有學問富貴忠直，合掌吏相之任。

第九、婁四足，胃四足，昴一足，熒惑位焉。其神如羊，故名羊宮。主有景行之事。若人生屬此宮者，法合多福德長壽又能忍辱，合掌厨饈之任。

第十、昴三足，畢四足，觜二足，太白位焉。其神如牛，故名牛宮。主四足畜牧之事。若人生屬此宮者，法合有福德、足親友、長壽、得人貴敬，合掌馬廐之任。

第十一、觜二足，參四足，井三足，辰星位焉。其神如夫妻，故名姪宮。主胎妊子孫之事。若人生屬此宮者，法合多妻妾、得人愛敬，合掌戶鑰之任。

第十二、井一足，鬼四足，柳四足，太陰位焉。其神如蟹，故名蟹宮。主官府口舌之事。若人生屬此宮者，法合惡性欺誑、聰明而短命，合掌刑獄訟之任。

上古白博又二月春分朔，于時曜躔婁宿，道齊景正，日中氣和，庶物漸榮，一切增長。梵天歡喜，命為歲元(景風曰：大唐以建寅為歲初，天竺以建卯為歲首。然則大唐令月皆以正月二三四至于十二，則天竺皆據白月十五日夜太陰所在宿為月名，故呼建卯為角月、建辰為氏月，則但呼角氏心箕之月，亦

不論建卯建辰及正二三月也。此東西二之異義，學者先宜曉之，今又二詳釋如左也)。

角月(景風曰：唐之二月也，斗建卯位之辰也) 氏月(景風曰：唐之三月也，斗建辰位之辰也)

心月(景風曰：唐之四月也，斗建巳位之辰也) 箕月(景風曰：唐之五月也，斗建午位之辰也)

女月(景風曰：唐之六月也，斗建未位之辰也) 室月(景風曰：唐之七月也，斗建申位之辰也)

婁月(景風曰：唐之八月也，斗建酉位之辰也) 昴月(景風曰：唐之九月也，斗建戌位之辰也)

觜月(景風曰：唐之十月也，斗建亥位之辰也) 鬼月(景風曰：唐之十一月也，斗建子位之辰也)

星月(景風曰：唐之十二月也，斗建丑位之辰也) 翼月(景風曰：唐之正月也，斗建寅位之辰也)

(新演如左。景風曰：以梵本初翻，學言隱密。唐之迷惑，不曉其由，自非久習致功，卒難行用。今請演舊為新。取歷月日列為立成，成前更為大唐月建十二辰圖，參之以宮名、會之以宿次，然後則曉然可觀、義理不隱。庶當代高才知此意也。

大唐月建圖 每十二月日數。

正月、二月、三月、四月、五月、六月、七月、八月、九月、十月、十一月、十二月。

- 一日 虛室奎胃畢參鬼星翼角氏心
- 二日 危壁婁昴觜井柳張軫亢房尾
- 三日 室奎胃畢參鬼星翼角氏心箕
- 四日 壁婁昴觜井柳張軫亢房尾斗
- 五日 奎胃畢參鬼星翼角氏心箕牛
- 六日 婁昴觜井柳張軫亢房尾斗女
- 七日 胃畢參鬼星翼角氏心箕牛虛
- 八日 昴觜井柳張軫亢房尾斗女危
- 九日 畢參鬼星翼角氏心箕牛虛室
- 十日 觜井柳張軫亢房尾斗女危壁
- 十一日 參鬼星翼角氏心箕牛虛室奎
- 十二日 井柳張軫亢房尾斗女危壁婁
- 十三日 鬼星翼角氏心箕牛虛室奎胃
- 十四日 柳張軫亢房尾斗女危壁婁昴
- 十五日 星翼角氏心箕牛虛室奎胃畢
- 十六日 張軫亢房尾斗女危壁婁昴觜

十七日	翼角氏心箕牛虛室奎胃畢參
十八日	軫亢房尾斗女危壁婁昴觜井
十九日	角氏心箕牛虛室奎胃畢參鬼
二十日	亢房尾斗女危壁婁昴觜井柳
二十一日	氏心箕牛虛室奎胃畢參鬼星
二十二日	房尾斗女危壁婁昴觜井柳張
二十三日	心箕牛虛室奎胃畢參鬼星翼
二十四日	尾斗女危壁婁昴觜井柳張軫
二十五日	箕牛虛室奎胃畢參鬼星翼角
二十六日	斗女危壁婁昴觜井柳張軫亢
二十七日	牛虛室奎胃畢參鬼星翼角氏
二十八日	女危壁婁昴觜井柳張軫亢房
二十九日	虛室奎胃畢參鬼星翼角氏心
三十日	危壁婁昴觜井柳張軫亢房尾

)

仙人問言：凡天道二十七宿有闊有狹，皆以四足均分別，月行或在前後，驗天與說差互不同，宿直之宜如何定得？菩薩曰：凡月宿有三種合法，一者前合、二者隨合、三者並合，知此三則宿直可知也。云何前合？奎、婁、胃、昴、畢、觜六宿為前合也。

云何為並合？參、井、鬼、柳、星、張、翼、軫、角、亢、氏、房十二宿為並合。

云何為隨合？心、尾、箕、斗、女、虛、危、室、壁九宿為隨合。凡宿在月前、月居宿後為前合。月在宿前、宿在月後，如犢隨母為隨合。宿月並行，為並合也(景風曰：凡天象之法，西為前、東為後。如月在宿東、宿在月西，則是宿在月前、月在宿後。他皆倣此也)。

頌曰：

六宿未到名前合， 十二宿月左右合，
九宿如犢隨從母， 奎宿直應當知耳。

宿曜曆經序日宿直所生品第二

昴圖。昴六星，形如剃刀，火神也，姓某尼裴苦，食乳酪。此宿直日，宜火作煎煮、計算畜生、合和酥藥、作牛羊坊舍、種蒔、入宅、伐逆除暴、剃頭並吉。若用裁衣必被火燒。此宿直生人，法合念善、多男女、勤學問、有容儀。性合慳澁、足詞辯(景風曰：中國天文，昴七星，主胡兵，西方之宿也。然今案經文，說星多不與中國相符，覽者遽生疑惑，今請依中國天文二圖，其星於脚下發，讀之者高明則心無所昧矣)。

畢圖。畢五宿，形如半車，鉢闍鉢底神也，姓瞿曇，食鹿肉。此宿直日，宜農桑種蒔、修理田宅、通決溝渠、修橋道作諸安久之事，不宜放債及出財納穀米。若用裁衣，必多饒事務。此宿直生人，法合多財產、足男女，性聰明、好布施、有心路、省口語、心意不翻動、行步如牛王、有容儀(景風曰：中國天文畢八星，主邊兵，西方之宿也)。

觜圖。觜三星，形如鹿頭，月神也，姓婆羅墮闍，食鹿肉。此宿直日，宜作舍屋及造旌纛、床帳家具、入新宅、嫁娶、沐浴裝束、入壇祭星曜除災害吉。此日裁衣，被鼠咬。此宿生人，法合有名聞景行、美容貌、心肚慎淨、愛服藥必得力、心口隱密舉動不輕燥，為人好法、用愛禮儀(中國天文，觜三星，主軍之士，西方之宿也)。

參圖。參一星，形如額上點，魯達羅神，姓盧醯底耶，食血。此宿直日，宜求財及穿地、賣乳酪、煮酥、押油及諸剛猛之事。若用裁衣，終慎鼠厄。此宿生人，法合猛惡梗戾嗜瞋、好合口舌、毒害心硬、臨事不怯(景風曰：中國天文，參十星，主將軍，西方之宿也)。

井圖。井二星，形如屋楸，日神也，姓婆私瑟吒，食蘇餅。此宿直日，宜惠施貧窮必獲大果，凡有所作必得成就。又宜祭天、宜嫁娶納財。不宜合藥服食。若用裁衣，必相分離。此宿生人，法合錢財或有或無，情愛聲名、作人利官，縱有官厄還得解脫，受性饒病亦多男女。高故議有急難，若論景行稍似純直(景風曰：中國天文，井八星，主天門，南方之宿也)。

鬼圖。鬼三星，形如瓶，藥利訶馱撥底神也，姓謨闍耶那，食蜜，[飢-几+少]糖，稻穀華及乳粥。此宿直日，宜作百事譽長壽。若理王事及諸嚴飾之相，拜官昇位入壇受鎮。學密法吉。若用裁衣，必有吉祥勝事。此宿生人，法合分相端政、無耶僻、足心力、合多聞、有妻妾豐饒財寶、能檢校處分又足親(景風曰：中國天文，鬼五星，主官寮，南方之宿也)。

柳圖。柳六星，形如蛇，神也，姓曼陀羅耶，食蟒蛇肉。此宿直日，宜作剛猛斷決、伐逆除惡、攻城破賊、吞害天下。若用裁衣，後必遭失。此宿生人，法合軟眼、饒睡性虛、梗戾嗜瞋、不伏人欺，又好布施亦好解脫，耽著情事、難得心腹(景風曰：中國天文，柳八宿，主廚饈之任，南方之宿)。

星圖。星六星，形如猛，薄伽神也，姓瞿必毘耶那，食卒日消。此宿直日，宜種蒔雜物亦宜種五穀、宜修宅舍祭祀先亡。若用裁衣，後必損失。此宿生人，法合愛[口*爭]競、不能自押捺[口*著]瞋怒，父母生存不能孝養、死後方崇祭饗追念，亦足奴婢畜乘資產，有名聞，足却泡亦多兼却泡，一生之間好祈禱神廟(景風曰：中國天文，星七星，主衣服，南方之宿也)。

張圖。張二星，形如杵，婆藪神也，姓瞿那律耶，食乳粥。此宿直日，宜喜慶事，求女婚娶、修宅、拜官、作新衣、受長密法、學道承仙並吉。若用裁衣，必被官奪。此宿生人，法合足妻妾、多男女，出語愜人意甚得人愛，少資財智策亦不多業，合得人財(景風曰：中國天文，張六星，南方之宿也)。

翼圖。翼二星，形如跏趺，利耶摩，姓遏啞黎，食栗蘇。此宿直日，宜所作皆吉，買田宅、築牆穿塹、修農業種蒔，凡諸安久之事並吉。若用裁衣，後必更得財。此宿生人，法合愛騎乘鞍馬、駕馭車牛，布施喫用、觸處遊從，為人穩口語，受性愛音樂(景風曰：中國天文，翼二十二星，主府縣事，南方之宿也)。

軫圖。軫五星，形如手，毘婆怛利神也，姓跋蹉耶那，食乳粥。此宿直日，宜急速事，遠行外國、修理衣裳、學藝業、婚娶、開園圃並吉。此宿生人，法合有諸寶物業，合遊歷州縣。稟性嫉妬、為人少病，能立功德兼愛車乘(景風曰：中國天文，軫四星，主車乘騎，南方之宿也)。

角圖。角二星，形如長幢，瑟室利神也，姓僧伽羅耶那。此宿直日，宜嚴飾、造衣裳、寶物錦繡之事，觀兵行軍、祭祀天神、賞賜將士並吉。若用裁衣，終當逃亡。此宿生人，法合善經營、饒六畜，所作事多合。又手巧，所作愜人情。只合二男(景風曰：中國天文，角二星，主天門，東方之宿也)。

亢圖。亢一星，形如火珠，風神也，姓蘇那，食大麥、飲菘豆酥。此宿直日，宜調象馬，又宜教擊鼓，婚娶、結交、種蒔並吉。若用裁衣，後必得財。此宿生人，法合統領頭首、辯口詞，能經營、饒財物，淨潔裝束、愛喫用、造功德，足心力、益家風(景風曰：中國天文，亢四星，主兵，東方之宿也)。

氏圖。氏四星，形如牛角，因伽陀羅祇尼神也，姓邏怛利，食烏麻雜華。此宿直日，宜種蒔五穀菓木、醞酒，不宜起動房舍車馬之事。若用裁衣，多逢親識。此宿生人，法合有分相、好供養天佛、心性解事，受性良善，承君王優寵、富饒財物、利智、足家口(景風曰：中國天文，氏四星，主侵害，東方之宿也)。

房圖。房四星，形如帳，布密多羅神也，姓多羅毘耶，食酒肉。此宿直日，宜交婚姻、喜慶吉祥之事，及受戒律、入壇受灌頂、修仙學道昇位並吉。若用裁衣，後必更裁。此宿生人，法合有威德、足男、女饒錢財，合快活、紹本族、榮家風(景風曰：中國天文，房四星，主天道，東方之宿也)。

心圖。心三星，形如階，因陀羅神也，姓僧訖利底耶那，食粳米蔬乳。此宿直日，宜作王者所須事，兼宜嚴服昇位、登壇拜官職、畜乘、案摩理身、修功德並吉，不宜出財及放債。若用裁衣，必遭死

亡盜賊。此宿生人，法合處族眾得愛敬，承事君王多蒙禮侍，摧惡獎善、運命得所(景風曰：中國天文，心三星，主明堂印政，東方之宿也)。尾圖。尾二星，形如師子頂毛，儺律神也，姓迦底那，食乳菓花草。此宿直日，宜沐浴、厭呪、置宅、種樹、合藥、散阿伽陀藥并入壇並吉。若用裁衣，必遭爛壞。此宿生人，法合足衣食、多庫藏。性慳澁、志惡戾諍競，合得外財力，性愛花藥(景風曰：中國天文，尾九星，主後宮士，東方之宿也)。

箕圖。箕四星，形如牛步，水神也，姓刺婆耶尼，食瞿陀甜苦味。此宿直日，宜穿地造舍、決渠開水、種花藥、修園圃、醞酒醬並吉。若用裁衣，後必得病。此宿生人，法合遊涉江山、經營利閨，為人耐辛苦，立性好姪逸婦人、饒病、愛酒(景風曰：中國天文，箕四星，主妃后，東方之宿也)。

斗圖。斗四星，形如象步，毘說神，姓毘耶羅那，食蜜[飢-几+少]稻花。此宿直日，宜著新衣及安久之事，置庫藏、修理園林、造車乘、營田宅、造寺宇、作兵器並吉。若用裁衣，多得美味。此宿生人，法合愛鞍馬、歷山林，愛祈禱祀、結交賢良、多伎能、足錢財(景風曰：中國天文，斗六星，主江湖，北方之宿也)。

牛圖。牛宿吉，甚吉祥。其宿三星，形如牛頭，風梵摩神也，姓奢拏耶那，食乳粥香花藥。此宿生人，法合福德所作不求(景風曰：案天竺以牛宿為吉祥之宿，每日牛時直事，故天竺以牛時為吉祥之時也。瞿曇氏以歷經者，牛宿吉祥女圖術是也。今說牛星，又與中國亦別。案中國天文，牛宿六星，主開渠河，北方之宿也)。

女圖。女三星，形如梨格，毘藪幻神也，姓日揭連耶那，食新生酥及鳥肉。此宿直日，宜為公事、置城邑、立卿相、發兵、造戰具，并學伎能、穿耳、理髮案摩並吉。不宜初著新衣，或因之致死。又不宜諍競。若用裁衣，必足病痛。此宿生人，法合足心力、少病、好布施、守法律、勤道業、榮祖宗(景風曰：中國天文，女四星，主藏府士，北方之宿也)。

虛圖。虛四星，形如訶梨勒，娑婆神也，姓婆私迦耶，食於大豆喻沙。利上云：和水煮如乳狀，為喻沙相也。此宿直日，宜建急事、學問，及沐浴乞子法、供養婆羅門、置城邑、營兵馬，及初著新衣、嚴飾冠帶並吉。若用裁衣，多得糧用。此宿生人，法合足穀、多貯積、長命富勝、蒙君王寵愛，又好響禱神廟、終身快樂、不合辛苦(景風曰：中國天文，虛二星，主宰相位，北方之宿也)。

危圖。危一星，形如花穗，婆魯拏神也，姓丹荼耶，食羝羊肉。此宿直日，宜合藥避病、穿池種麻、商人出行、納財、造船、醞酒並吉。若用裁衣，心遭毒厄。此宿生人，法合嗜酒耽姪、耐辛苦、心

膽硬，與人結交必不久長、無終始。又能處分事務、解藥性、多嗔(景風曰：中國天文，危三星，主墳墓，北方之宿也)。

室圖。室二星，形如車轆，阿醯多陀難神，姓闍耶尼，食一切肉。此宿直日，宜為剛猛事，勘罪人、捕姦捉非。若為吉事，不宜。若用裁衣，必遭水厄。此宿生人，法合決猛惡，性嗜嗔、愛劫奪、能夜行不怕慮，性輕燥毒害、無慈悲(景風曰：中國天文，室二星，主宗廟，北方之宿也)。

壁圖。壁二星，形如立竿，尼陀羅神也，姓瞿摩多羅，食大麥飯酥乳。此宿直日，宜造城邑、婚娶，永久長壽增益吉慶。不宜南行。若用裁衣，多得財物。此宿生人，法合承君王恩寵，為姓慎密慳澁、有男女愛、供養天佛亦好布施、不多愛習典教(景風曰：中國天文，壁二星，主圖書祕法，北方之宿也)。

奎圖。奎三十二星，形如小艇，甫涉神也，姓曼茶鼻耶，食肉及飲[飢-几+少]。此宿直日，造倉庫及牛馬坊，按算、畜牧、醞酒、鑄糟、冠帶、出行並吉。若用裁衣，必得寶器。此宿生人，法合有祖父產業，及有經營得錢財，物合用盡後更得之，事無終始。為性好布施，亦細澁業。合遊蕩、足法用、慕善人作勝律儀之事、無終始、賞男女、受教學典教(景風曰：中國天文，奎十六星，主武庫，西方之宿也)。

婁圖。婁三星，形如馬頭，乾闥婆神也，姓河說耶尼，食烏麻雜菰。此宿直日，宜為急速之事，合和服藥、內牛馬吉。若用裁衣，必增益衣服。此宿生人，法合多技能、少疾病、妙解醫方。性好和合、布施，足田疇、多遊僕從，合事君王。受性勤公務、稟志慎密(景風曰：中國天文，婁三星，主林苑，西方之宿也)。

胃圖。胃三星，形如三角，闍摩神也，姓粟笈婆，食烏麻稻米蜜肉。此宿直日，宜為公事及王侯修善事並吉。用剛猛伐逆取叛、除凶去姦非並吉。若用裁衣，必損減資福。此宿生人，法合膽硬、惡性靈、耽酒嗜肉、愛驅策劫奪強暴。稟志輕躁、足怨敵、饒男女、多僕從(景風曰：中國天文，胃三星，形如角，主兵軍，西方之宿也)。

凡畢、翼、斗、壁為安重宿，等直日，宜造宮殿、伽藍、館宇、寺舍，種蒔、修園林、貯納倉庫、收積穀米、結交朋友、婚姻、榮命時相、造家具、設學、供養、入道場及安穩，并就師長入壇受灌頂法，造久長之事並吉。唯不宜遠行、索債、無保進路、造酒、剃頭剪甲、博戲。若此宿生人，法合安重威肅、正福德、有大名聞。

凡觜、角、房、奎為和善宿，此宿直日，宜入道場、問學技藝、習真言、結齋戒、立道場受灌頂、造功德、設音樂，及吉祥事喜慶、求婚、舉放、對君王參將相、冠帶出行、服藥合和並吉。若此宿生人，法合柔軟溫良，聰明而愛典教。

凡參、柳、心、尾為毒害宿，此等宿直日，宜圍城破營、設兵掠賊、交陣破敵、劫盜擄捕、射獵並吉。若此直日生人，法合慘毒、剛猛惡性。

凡鬼、軫、胃、婁為急速宿，此等宿直日，宜放債貸錢、買賣交關、進路出行、調六畜、乘習鷹鷂、設齋行道、入學受業、服藥、入道場受灌頂、市買並吉。此宿生人，法合剛猛而捷疾，有筋力。凡星、張、箕、室為猛惡宿，此等宿直日，宜守路設險、劫掠相攻、擄捕、博戲、造兵器、謀斷、決囚徒、放藥、行酪、射獵、祭天祀神、承兵威並吉。此宿生人，法合兇害猛殺，宜捨身出家作沙門。

凡井、亢、女、虛、危五星為輕燥宿，又為行宿。此等宿直日，宜學乘象馬、驕射馳走、浮江汎舟、奉使絕域和國人蕃，又勸行禮樂、蘭閱兵馬、種蒔、造酒、合和藥並吉。此宿生人，法合澆薄，不然則質直平穩。

凡昴、氏為剛柔宿，此等宿直日，宜鍛鍊爐冶、修五行家具，及造瓦、買賣之事。又宜設齋、送葬、鑽鍊酥乳、計算畜生、入宅、王者作盟會並吉。此宿生人，法合為性寬柔而猛，君子之人流也(景風曰：會經文言語，多有中國之俗，如擄捕戲、和國人蕃之類也，並是翻異西言譯同東語，庶覽之者悉之，幸不以文害意旨也)。

宿曜文殊曆序三九祕宿品第三

一九之法 命宿 榮宿 衰宿 安宿 危宿 成宿 壞宿 友宿 親宿

二九之法 業宿 榮宿 衰宿 安宿 危宿 成宿 壞宿 友宿 親宿

三九之法 胎宿 榮宿 衰宿 安宿 危宿 成宿 壞宿 友宿 親宿

此法以定人所生日為宿直、為命宿、為第一，次以榮宿，又次衰宿，及安宿、危宿、成宿、壞宿、友宿、親宿，如是九宿為一九之法。其次則以業宿為首，以下九准前，為二九之法。次則以胎宿為首，以下九准前。三九之法而周二十七宿，眾為祕密(景風曰：假如有人二月五日生者，其人屬畢宿，即以畢宿為第一命，以次觜宿為榮宿、參為衰宿、井為安宿、鬼為危宿、柳為成宿、星為壞宿、張為友宿、翼為親宿。軫為業宿，角為榮宿、亢為衰宿，並同友直。如女胎宿，虛為榮宿，已下准前，是為三九之法。他皆准此)。

和上云：凡與人初結交者，先須看彼人命宿押我何宿，又看我命宿押彼人何宿，大抵以榮、安、成、友、親為善，堪結交；自餘並

惡，不可與相知。以為祕法耳(景風曰：案太史有舊翻九執宿命，古殊未有此法，今則新譯，庶用傳之流行萬代耳)。

凡命、胎宿直日，不宜舉動百事。業宿直日，所作皆吉祥。衰、危、壞宿日，並不宜遠行，出入遷移、買賣裁衣、剃頭剪甲並不吉。壞日，又宜壓鎮降伏怨讎及討伐暴惡。安日，移動遠行、修園宅臥具、作壇場並吉。危日，宜結交婚姻、歡會宴聚吉。成日，修學問道、合藥求仙吉。友、親日，宜結交朋友大吉。

凡日月直，星沒。

犯逼守命、胎之宿，此人是厄會之時也，宜修功德、持真言念誦、立道場以禳之。

若犯業宿及榮、安、成、友、親等宿，並所求不遂、百事迍邐，亦宜修福念善。

若犯衰、危、壞等宿者，則所求稱意、百事通達(景風曰：凡欲知五星所在分者，據天竺曆術推知何宿，具知也。今有迦葉氏、瞿曇氏、拘摩羅等三家天竺曆，並掌在太史閣。然今之用，多用瞿曇氏曆，與大術相參供奉耳)。

宿曜曆經序七曜直日品第四

夫七曜，日、月、五星也。其精上曜于天，其神下直于人，所以司善惡而主理吉凶也。其行一日一易，七日一周，周而復始。直神，善惡言具說之耳(景風曰：推求七曜直日法，今具在此經卷末第八曆算法中具備足矣)。

日精日，太陽直日，宜策命拜官、觀兵習戰、持真言、行醫藥、放群牧、遠行、造福設齋祈神、合藥、內倉庫、入學、論官並吉。不宜諍競、作誓、行姦、對陣不得先起。若人此曜直日生者，法合足智策、端政美貌、孝順短命。若五月五日得此曜者，則其歲萬物豐熟。若有虧蝕地動者，則萬物莫實，不千日為殃。

月精日，太陰直日，宜造功德成就、作喜樂僚、教女人、裁衣服、造家具、安床、穿渠、修井竈、買賣財物、倉庫內財、洗頭割甲、著新衣並吉。不宜婚嫁、入宅、結交、私精出行大凶。奴婢逃走難捉得、囚繫者出遲。不宜殺生及入陣，並凶。此日生人，合多智策、美貌、樂福田、好布施、孝順。若五月五日得此曜者，歲多疾病、秋足霜冷。若有虧蝕地動者，則歲中饒疾死。

火精日，熒惑直日，宜決罰罪人、國取盜賊、作欺誑事、買金寶牛羊、動甲兵、修戎具教旗，剋賊必勝、訴訟先起，合藥、種蒔、割甲、結婚。不得出財徵債，禁者難出、病者必死。若此直日生人，法合醜陋惡性、妨親害族，便弓馬多嗔。若五月五日得此曜者，則歲中多諍競。若虧蝕地動者，則歲中多有兵馬損傷。

水精日，辰星。辰星直日，宜入學事師長、學工巧伎能、攻城，又宜舉債、出行、怨敵伏讎得財，唯不宜修造宅舍、對戰鬪敵、作賊妄語並凶。被囚者，即後必有陰謀，說動當時。若五月五日得此曜者，則歲中有水災。虧蝕地動，則百物不熟、人多瘴癘耳。

木精日，歲星。歲星直日，宜策命使王及求善知識，并學問、禮拜修福、布施、嫁娶，作諸吉事、請謁，及結交、入宅、著新衣、沐髮、種菜木、調伏象馬、買奴婢並吉。若為凶事則大凶。若人此日生者，法合貴重榮祿。若五月五日得此曜者，歲中豐熟。若有虧蝕地動，則公王必死。

金精日，太白。太白直日，宜見大人官長、沐浴冠帶、求親結婚，良友罪饌宜入宮至並吉。逃亡難得、畋獵并戰不吉。若人此直日生者，法合短命好善，人皆欽慕。若五月五日得此直日者，則下田不牧，歲中驚擾之事。若虧蝕地動者，則六畜多損傷耳。

土精日，鎮星。鎮星直日，宜修園圃、買賣田地弓馬、合藥、伏怨、放火、立精舍、作井竈吉。唯不宜結婚冠帶及出行。若人此日生者，法合少病、足聲名、少孝順、信朋友。若五月五日得此直者，則合歲中多土功。若虧蝕地動者，則國中人民不安泰(景風曰：茫茫大造化乃為陰陽，精曜運天、靈神直地，吉凶之應唯人信之。故譯出此法，為伐祕密經，庶傳習者幸無謬矣。凡人出行，不得面衝七曜。若衝日曜，當遭大厄；若衝月曜，親眷多傷；若衝木曜，家人背心；若衝土曜，必有死厄；若衝金曜，則災祥併至)。

乃為頌曰：

日火月建，德貴神眷，歲背鎮死，金衝併至。

宿曜曆經祕密雜占品第五

凡如七曜運天犯著人六宮宿者，必有災厄，一者命宿、二者事宿、三者意宿、四者聚宿、五者同宿、六者克宿。從命數第十為事宿，第四為意宿，第十六為聚宿，第二十為同宿，第十三為克宿(景風曰：有人屬婁宿者，向前數第四得畢為意宿，第十得星則為事宿，十三得軫則為克宿也。皆准此求即得也)。

若七曜犯命宿則亡失錢財必多災厄，若犯事宿則招殃咎，若犯意宿則必多愁苦，若犯聚宿則亡失財囚閉，若犯同宿則離坼不安家口衰耗，若犯克宿亡財失官勢力衰損。若七曜總不犯此六處者，則所為皆得(景風曰：皆須共三九祕宿相參，然後定災厄也)。

頌曰：

十事規求鎮不來， 四意愁煩因惱也，
十六聚失災厄形， 二十同路相乖背，

十三剋挫勢力名。

七曜與此宿不犯者，則百惡澄清。

凡日在本宮及第三第六第十位為果大吉。熒惑守本宿，大有災厄耳。月在本命宮及第六第七第三宮即為果吉。歲星與在第三第七劣九宮者吉。辰與氏第四第十宮者並吉。太白在本命宮者，合有大厄。凡人有災厄時，可持真言立道場而用禳之。若有人不記得本所屬宿而來問我者，何以答之？日皆先須看人初來之時觸著處而斷之，則可知耳。若先觸頭者則屬昴宿，若先觸額者則屬畢宿，若先觸眉者則屬觜宿，若先觸眼者則屬參宿，若觸兩頰及耳者則屬井宿，若先觸牙及胸者則屬鬼宿，若觸齒者則屬柳宿，若觸項者則屬星宿，若觸右肩則屬張宿，若觸左肩則屬翼宿，若觸手者則屬軫宿，若觸頰頤者則屬角宿，若觸缺盆及項下胸上者則屬亢宿，若觸臆者則屬氏宿，若觸右臂則屬房宿，若觸左臂則屬心宿，若觸心脾骨者則合屬尾宿，若觸右脅者則屬箕宿，若觸左脅者則屬斗宿，若觸臍者則屬牛宿，若觸腹肚者則屬女宿，若觸小腸下者則屬虛宿，若觸胯腿及後分者則屬危宿，若觸右腿髀者則屬室宿，若觸左腿髀者則屬壁宿，若觸膝肘者則屬奎宿，若觸脛者則屬婁宿，若觸脚者則屬胃宿(景風曰：若人不得本生月日者，則知本所屬宿用此法以定之。和上以此法門為祕密耳)。

凡軫星大陽直，畢宿大陰直，星宿土直，尾宿火直，柳宿水直，鬼宿木直，房宿金直，此等七日名為甘露吉祥日，宜學道求法，受密印及習真言。

凡尾宿大陽直，心宿大陰直，壁宿火直，昴宿水直，井宿木直，張宿金直，亢宿土直，此等七日名為金剛峯日，宜降伏魔怨，持日天子真言。

凡胃宿大陽直，鬼宿大陰直，翼宿火直，參宿水直，氏宿木直，奎宿金直，柳宿土直，右此等七日名為羅剎日，不宜舉動百事，唯射獵及諸損害之事也。

宿曜曆經序黑白月分品第六

凡月有黑白兩分，從一日至十五日為白月分，從十六日至三十日為黑分。每月白月一日三日五日七日十日十一日十三日，黑月一日三日五日七日十日十一日十三日，所向皆成就，名為吉祥日。

又白月四日夜、八日晝、十一日夜、十五日晝，黑月三日夜、七日晝、十日夜、十四日晝，為凶惡時，所作不成就。

又白月二日六日九日十二日，又黑月二日六日九日十二日十四日，此等平時，隨立宿曜為吉凶。

又白月四日十一日夜、八日十五晝，黑月三日十日夜、七日十四日晝，凶惡氣生時，所作反招殃咎。

凡凶惡之日，日中已後却成吉時；凶惡之夜，夜半已後却成吉時。

乃為頌曰：

一三五七十， 十一與十三，
於二白黑分， 所作皆成就。
黑三夜七晝， 十夜十四晝，
白四夜八晝， 一夜十五晝，
於此白黑分， 晝夜不成就，
日中夜已後， 所求皆成就。

宿曜曆經序日名善惡品第七

從一日至十六日(景風曰：一日即是白月之一日也，十六即黑月之一日也。今恐讀者難會，故略云黑白之言，直裁日數之爾)，名為建、名日。梵天下，宜為善業、學道求仙及事師尊宿並吉，唯不宜遠出行耳。

凡二日十七日，名為得財日，造化神下，宜合藥、按摩、工巧、出行、結交、婚親、增益田宅並吉。

凡三日十八日，名為威力日，那羅延下，宜摧敵除逆、習戰畜獸、獎訓下人、營田種蒔大吉。

凡四日十九日，名為猛武日，閻羅天下，宜作惡業、殺害殘賊、摧伏叛逆則吉，為善事却凶。

凡五日二十日，名圓滿日，日天子下，宜為善業，修營床帳及車乘衣服、營田宅、結婚並吉。

凡六日二十一日，名為求名日，童子神下，宜為久長安定事，營宅宇、寢廟，及建國邑、伽藍、牛馬坊廐等並吉；不宜出行。

凡七日二十二日，名為友朋日，北斗天下，宜結交、慶喜、安定、和藥，王者初服及造旌旗帷帳並吉；唯不宜遠行。

凡八日二十三日，名為大戰日，婆藪天下，宜為力用之事，造兵仗、城壘、穿濠塹並吉。

凡九日二十四日，名為凶猛日，毘舍闍鬼下，宜圍城縛敵、進途伐逆；不宜入宅及削髮並凶。

凡十日二十五日，名為善法日，善法神下，宜安久之事及急速飛捷，穿鑿井竈、修道、作功德、伽藍順法之事並大吉。

凡十一日二十六日，為慈猛日，自在天下，宜新立宅舍、營建城廟館宇廐[土*曹]，及設大祭、祀天神並吉。

凡十二日二十七日，為名聞日，日天子下，宜作久長安國之事，及車乘倉庫並吉；唯不宜放債。

凡十三日二十八日，為最勝日，大魔王下，宜所作皆急速皆吉，及著衣服華鬘、金玉裝畫，又宜嫁娶、修車乘、入壇場學法求道吉。凡十四日二十九日，為勇猛日，藥叉大將下，宜擒縛掩捕、詭詐相謀害大吉；唯不宜遠行。

凡十五日三十日，為吉祥日，魂靈神下，宜祭先亡、作婆羅門大祭求福、布施供養師僧尊長、學戒、善事、求法大吉。

文殊師利菩薩及諸仙所說吉凶時日善惡宿曜經卷上

文殊師利菩薩及諸仙所說吉凶時日善惡宿曜經卷下

開府儀同三司特進試鴻臚卿肅國公食邑三千戶賜紫贈司空諡大鑑正
號大廣智大興善寺三藏沙門不空奉 詔譯

西國每一月，分為白黑兩分。

入月一日至十五日，為白月分(以其光生漸明白之謂也)。入月十六日至三十日，為黑月分(以其光漸減黑之謂也)。文殊師利菩薩說時日偈云：

一三五七十， 十一與十三，
於二黑白分， 所作皆成就。
黑三夜七晝， 十夜十四晝，
白四夜八晝， 一夜十五晝。

(所謂一夜者，十一夜也。勒頌者貴省文也)

於此黑白月， 晝夜不成就，
日中及中夜， 已後皆通吉。

擇日

每入月，一日十六日、三日十八日、五日二十日、七日二十二日、十日二十五日、十一日二十六日、十三日二十八日。
已上是吉日，所作吉祥事必成就。

擇時

入月，四日夜八日晝、十一日夜十五日晝、十八日夜二十二日晝、二十五日夜二十九日晝。

已上日晝夜之時，所作皆不吉，為事不成。惡猶不可作，何況善事，如於鹹鹵之地種物不生。

入月，二日六日、九日十二日、十四日十七日、十九日二十一日、二十三日二十四、日二十七日三十日。

已上平日，若與好宿好曜并者即吉，如與惡宿惡曜并者即凶。夫凶惡晝日中已後通吉用，凶惡夜半已後亦通吉用。

白黑月所宜吉凶曆

每月一日十六日，梵云鉢闍鉢底下(唐云梵王)，是建名日，宜為善業、學伎藝、苦節修行布施等事，及作愛敬、增益長久之事並吉；不宜遠行。

二日十七日是得財日，梵云苾利訶馱鉢底神下(唐云造化神下)，宜按摩、合藥、作工巧法、遠行進路、結交婚姻。

三日十八日是威力日，梵云毘紐神下(亦云那羅延天下)，宜摧敵除逆、調習象馬四足諸畜等，及訓將惡人下賤之類，營田種蒔有大為作事皆吉。十八日夜惡，中夜已後還吉。

四日十九日是猛武日，梵云閻謨神下(唐云閻羅王下)作惡業日，是殺害日，與一切不善事殘酷業皆悉相應，宜摧敵破逆吉。餘不吉。四日夜不吉，中夜已後吉。

五日二十日是圓滿日，梵云蘇謨神下(唐云月天子下)，宜修福善業，作臥具床座、衣服莊飾物及車輿等物，營田宅、結婚姻，凡諸慶樂事並吉。

六日二十一日是求名日，梵云摩羅神下(唐云童子天下)，宜諸久長安定之事，營田宅及天廟、福舍、伽藍、建城邑，立牛馬坊、諸畜坊廐並吉；不宜遠行進路。

七日二十二是朋友日，梵云七婆怛沙耶仙神下(唐云北斗也)，宜結朋友、安定之事，王者服新衣，及熏幟床座臥具、大寶嚴飾之物並吉。二十二晝惡，午後吉。

八日二十三日是力戰日，梵云婆娑善神下(唐云婆藪天下)，宜力用之事，宜修造攻戰之具、置邊衝險固城壘塚塹、調乘象馬等事並吉。八日晝惡，午後吉。

九日二十四日是凶猛日，梵云嚕達囉尼神下(唐云毘舍闍鬼王下)，宜圍城縛敵、進途伐逆取毒；不宜入宅、修理髮凶。

十日二十五是善法日，梵云蘇達謨神下(唐云善法神下)，宜作久長事及急速事，置井、穿鑿坑塹、行法修道，又作功德福舍、伽藍，凡諸順法及愛敬等事皆吉。二十五日夜不吉，半夜已後通吉。

十一日二十六日是慈猛日，梵云嚕捺嚧神下(唐云自在天下)，宜新立宅舍、營天廟、城邑、官曹館室、伽藍殿塔，及火祭室、功德福舍並吉。十一日夜惡，中夜後還吉。

十二日二十七日是最勝日，梵云阿逸都神下(唐云日天子下)，宜作久長安定事，及修輦輿、嚴飾頭髮、置倉生藏等吉；不宜放債取債。

十三日二十八日是最勝日，梵云鉢折底神下(唐云天魔下)，所為急速事，又宜敬愛之事、取婦人及乘車輿等，並入壇場習行道術並吉。

十四日二十九日是勇猛日，梵云藥葛神下(唐云藥叉將下)，宜往擒縛、相詭誑事、暴虐惡人、作非法之物，宜行詐妄詭誘怨敵，彼必信受；不宜遠行進路。二十九日晝惡，午後吉。

十五日三十日是吉相日，梵云必多盧神下(唐云魂靈神下)，宜祭先亡、宜作婆羅門大祠求安隱法，及布施、供養父母尊者諸天，持齋戒施食，及諸祭祠吉。十五日晝惡，午後吉。


右每月日所宜用吉凶如前，必審用之，萬不失一。其晝夜善惡，並如前嘉釋。

二十七宿十二宮圖(唐用二十八宿，西國除牛宿，以其天主事之故。十二宿，猶唐十二次。又說云：西國以子丑十二屬記年，以星曜記日，不用甲子者，以宿曜於人無功、於事尤當故。經云：日有一倍力，宿有四倍力，曜有八倍力，好時之力萬倍焉)

西國皆以十五日望宿，為一月之名。故二月為角月(西國以二月為歲首，以其道齊景正、日夜停分，時淑氣和、草木榮茂，一切增長，故梵天折為曆元)。

三月名氐月，四月名心月，五月名箕月，六月名女月，七月名室月，八月名婁月，九月為昴月(梵語昴星名迦提。西國五月十五日兩安居，至八月十五日滿已，後五月十五日滿已，後至九月十五日已來自恣，故號為迦提，但取星名而已。今中國迦提，即是事而妄者別為訓釋，蓋大謬焉)，十月名觜月，十一月名鬼月，十二月名星月，正月名翼月。夫欲知二十七宿日者，先須知月望宿日。欲數一日至十五日已前白月日者，即從十五日下宿逆數之可知。欲知十六日已後至三十日，即從十五日下宿順數即得。但依此即定(假如二月十五日是角日，十四日是軫日，十三日是翼日。若求十五日已後者，即十五日是角日，十六日是亢日，十七日是氐日。他皆倣此)。





夫欲求人所屬宿者，即於圖上，取彼生月十五日下宿，從此望宿逆順數之，至彼生日止，則求得彼人所屬宿也。又法略算求人本命宿，先下生日數，又虛加十三訖，即從彼生月望宿，用上位數順除，數盡則止，即得彼人所屬命宿(假令有人二月十七日生者，則先下十七日為位，又虛加十三，共得三十。即從二月望宿角亢氐房二十七宿一周法除之訖，餘三等，即角除一，亢除二，氐除三，則彼人是氐宿生。他皆倣此)。

夫取宿直者，皆月臨宿處，則是彼宿當直。又月行有遲疾，宿月復有南北，前後隨合如何可知，則以後頌言求之可解。頌曰：

六宿未到名合月， 十二宿月左右合，
 九宿如犢隨母行， 從奎宿數應當知。

頌言六宿未到名合月者，則從奎、婁、胃、昴、畢、觜此六宿，月未至宿，月則名彼宿直也。十二宿月左右合者，即參、井、鬼、

柳、星、張、翼、軫、角、亢、氐、房等，此十二宿日，臨彼宿上及前後南北，並取屬彼宿用得也。九宿如犢隨母行者，則配月為母、配宿為犢，則月居宿前、宿居月後，如犢母之像也。當以此頌復驗之於天，則宿月用之無差，此皆大仙密說也。

二十七宿所為吉凶曆

昴宿，宜火，則煎煮等事、檢算畜生即畜生、融酥和合、作牛羊諸畜坊舍及牧放、入溫室、種蒔黃色赤色等物、入宅及名金作等吉。宜伐逆除怨、作剃剪之具、賣物、求長壽、求吉勝事。不宜修理鬢髮及遠行道路。宜莊飾冠帶、佩服金彫等寶物。

畢宿，宜農桑種蒔、修田宅嫁娶、作厨舍、作食、作畜生舍、通決渠河、修橋梁、作諸安定之事、作衣服並吉。不宜取債放債。宜納穀及酒食雜物。不宜生財。

觜宿，作急要事及和善事並吉。宜種蒔白汁樹草等，又宜王者作舍作熏床座，又入新宅、嫁娶、修理髮、洗浴，作求吉勝法、著新衣、嚴飾、作喜樂、調畜生，作除災謹身呪術壇場之法，祭星曜、作髻並吉。

參宿，宜求財及諸剛嚴事，穿地、賣有乳畜生、造熟酥、押油、醞酒、押甘蔗、種甘蔗、畋獵及置關津等並吉。

井宿，有所惠施必獲大果，有所置事必成就。宜作諸祭婆羅門、祭法天法，宜嫁娶及納婦人，必子息繁盛。此宿所作事皆成吉，唯不宜合藥服。

鬼宿，所作皆吉。求聲譽、長壽，若為生事及諸端嚴相將其服拜官勝位，有所為求並皆吉祥福德增長。又宜遠行進路、修理髮、著新衣，及洗浴等事並吉。

柳宿，宜嚴拭事，是伐逆圍城、掩襲封潛、竊詭誓、詐敵人。時此宿兩者必蚊虻、苗稼滋盛。七星宿凡諸種蒔皆吉，唯不宜種藁。宜種五穀等、種芸薑，又宜修宅、祭先亡、將五穀入宅，作諸住定業並吉，亦宜修理鬢髮。

張宿，宜喜慶事，求女嫁娶、修理宅、作衣服、嚴飾物、作愛敬法等並吉。

翼宿，所作皆吉，置宅垣牆、穿塚作市、作城邑、作車輿、修農、商業、種蒔、嫁娶，凡作諸安定之事並吉。

軫宿，宜諸急速事，遠行向外國、修理鬢髮、取象調象乘象、學伎藝、求女人、嫁娶、服著衣裳、穿池修園圃、造垣牆等吉，除蕩竊逆南行大吉。

角宿，宜嚴飾事，取雜色衣、作安膳那、服藥，及取珊瑚金銀赤銅摩尼金剛諸寶物等諸珍帛，初王者嚴服觀兵，及進路作求安隱、祭

祀天神、賞賜將士金銀百穀衣物、入城，作花鬘臥具、歌舞詠唱并餘伎藝等並吉。

亢宿，宜調馬騾驢等，必易馴快利。宜教擊諸鼓樂等、嫁娶、結朋友。宜發遣怨讎，宜不自行動，宜種蒔樹木、種穀小豆大豆烏麻等皆吉。

氐宿，宜作農具，種大麥小麥稻粟等，并種蒔諸菓樹並吉。

凡諸有大為作事並不可作，宜醞酒漿、宜種蘘栽樹甘蔗等並吉。

房宿，宜結朋友、婚姻。凡和諸善事喜樂吉祥事，充好往還及攝清，受戒布施、發使置官、修道、學藝、工巧等吉。

心宿，宜作王者所須事，並宜嚴服昇位，及取捉象馬調乘諸畜等。宜按摩，必得身分潤滿。宜事王者及取左右驅使人等，宜修鬢髮、作農桑業。唯除營功德事，自餘不可，輒出財與人，及放債凶。

尾宿，宜作服著事，蒔樹種根及取煎吉。又宜剛嚴事，洗浴、除滅壓呪、種押蒲桃甘蔗、置宅置藏、作愛喜事、合湯及散阿伽陀藥，并壇場事並吉。

箕宿，宜剛嚴事，又掘溝渠、穿池井、通決河流、種水生花及根實者、修園圃、醞酒漿，及作橋梁等並吉。

斗宿，宜著新衣及安久事，置藏、修理園林、造車輿等乘載之物、營田宅城邑福舍寺等，作戰具及諸用物並吉。

女宿，凡為公事皆吉。出城外發教命、除逆敵、置城邑、立宰輔、發兵、作戰具取與，及呈學伎藝，穿耳，修理鬢髮，按摩並吉。不宜著新衣及競財穿池等。宜供養尊者、諸天、父母及諸貴勝。

虛宿，宜諸急速事，宜學問及夜浴、作求子法，其法不宜晝作，主產閹官。宜供養婆羅門，置城邑及置兵官財等。又宜還人財物、賣畜生、著衣著莊嚴具、作商業、新置伎藝並吉。

危宿，宜合藥、取藥、服藥並大吉。又宜嚴峻破惡之事，穿河池等及種麻豆等，發遣商人、納財、置吏、取醫、置藏、造舟船、醞酒漿等，及估賣商販吉。不宜出財。

室宿，宜作端嚴事，勘逐罪非、除滅兇逆、誑詭敵人；諸事並不宜作。

壁宿，宜作求長壽增益法，不宜南行。宜造城邑、取衣取財、嫁娶婚姻等喜善事皆吉。

奎宿，取珍寶，宜造倉庫及牛羊坊，按算畜生、造酒融酥，及作堤堰、研服藥、著新衣、服飾莊嚴、遠行進路，作和善事、急速事並吉。

婁宿，宜諸急速事，與藥、取藥、調乘象馬及出賣等並吉。

胃宿，宜為公事及王者之善事，亦宜作嚴整之事，伐逆除兇并調訓在下及馬等畜生並吉。

安重，畢、翼、斗、壁。此四是安重宿，宜造莊宅、宮殿、寺觀、義堂，種蒔裁接、修立園林、貯納倉庫、收積穀麥、納交投友、成禮為婚，冊君王、封將相、授官榮、錫班職，造裝具、設齋供、入道修行及祈安隱，并就師學、入壇場受灌頂，造一切久長事務悉須為之皆吉。唯不宜舉債、充保、遠行進路、造酒、剃毛髮、除爪甲、結仇嫌恨讎隙、習姪慾、學撒蒲等並凶。

和善，觜、角、房、奎。此等四是和善宿，宜入道、問學、伎藝，能習呪法、結齋戒、入壇受灌頂、建功德、設音樂，吉祥事、慶善業，成禮求婚、還錢舉債，見君王、參宰相，服飾新衣裳、冠帶好珠寶、作交關、營家業、進途、結親友、服湯藥、醫療眼、造一切穩善事務悉須為之吉。

毒害，參、柳、心、尾。此等四是毒害宿，宜圍城破營、徵兵喫賊、欺誑鬪爭、烈陣交鋒、申決烈破、和合行盜劫、設誓、摠蒲博戲、造械具戰具、閱兵馬點募健兒、採覘寇敵、漸決兇逆、誅戮罪人、施毒藥、施礮害、調習象馬、練祿鷹犬，一切猛浪事務悉須為之吉。其尾宿日，宜種蒔苗稼、栽接樹木、營造宅屋、立園林，一切嚴固鬪競剛柔猛浪辛苦等事並宜作之。

急速，鬼、軫、牛、婁。此等四是急速宿，宜放錢貸債、賣交關、行途進路、往使征伐、估客上道、商主過磧、調伏畜生、教習鷹犬、設齋行施、習讀經書、教人典誥、學諸伎能、服食湯藥并受佩持護身之術、豎幢建旌麾、造扇障營蓋傘、入壇場受灌頂、騎象馬乘輿，一切事務悉須為之。

猛惡，胃、星、張、箕、室。此五是猛惡宿，宜守路嶮、行劫行盜、構鬪端、起設誑、博戲摠蒲、強梁侵奪、姦非姪穢、國城斫營、造械具戰具、書兵謀、放毒藥、施礮害、斬決怨敵、誅戮罪逆、穰祭星辰、祈禱軍福、一切艱難事務悉須為之。

又張宿，宜作愛敬法。又其箕宿，宜鑿井穿坑、填水渠、開河路，一切勞擾事務悉須為之。

軫。井、亢、女、虛、危。此等五是輕宿，或名行宿，宜學乘騎象馬驢騾駝驢及水牛等諸畜，調習野獸并捉乘騎，汎舟繫棹、渡水浮江，奉使騁域、說敵和怨、徵納庸調、收斂租稅，觀音樂、看大禮、買賣興販、營造車、乘點閱兵士，一切輕捷事務悉須為之。又其危、井宿直，宜營稼穀、造酒醴、穿坑、通決河渠、合湯藥並吉。

剛柔，昴、氏。此二是剛柔宿，或名平等宿，兼善惡、帶剛柔，辛苦之務穩善之事悉須為之。又宜鍛鍊鐵、銷鑠金銀、打釧鈿環珮、造作五行調度、燒瓶瓦器、設齋造葬、焚屍埋殯、鑽燧變火、擊酪出酥、壓蒲桃、搗粬糖，放牛行禮、遣馬逐群、檢幸厩牧、點數畜生，造車器械具、從域出莊返城，移入新宅、棄劫舊墟室，答責非

為、決戮罪過并王者盟誓結信，一切如此事務悉須為之吉。又其氏宿，宜種蒔花藥、栽接樹木吉。

行動禁閉法

日屬軫宿，不得向北路行(縱吉時亦不可行)。

日屬女宿，不得向東行(縱吉時亦不可行)。

日屬鬼宿，不得向西行(縱吉時亦不可行)。

日屬婁宿，不得向南行(縱吉時亦不可行)。

第七秤宮(取角、亢日)

第十一瓶宮(取危、室日，已上東行大吉)

第五獅子宮(取星、張日)

第九弓宮(取尾、箕、斗日，已上西行大吉)

第八蝎宮(取互、房、心日)

第十二魚宮(取壁、奎日，已上向南行大吉)

第六女宮(取翼、軫日)

第四蟹宮(取鬼、柳，日已上向南行大吉)

第三男女宮(至參、井日，東行大吉)

第十摩竭宮(至女、虛日，南行大凶)

第一羊宮(至婁、胃、昴日，西行大凶)

第二牛宮(至畢、觜日，北行大凶)

右犯此辰宮宿日，越路發行，縱兵健人眾，不免輸他損失。

裁縫衣裳服著用宿法

昴必火燒， 畢饒事務， 觜必鼠咬，

參必逢厄， 井必分相， 鬼必吉祥，

柳必棄失， 星必喪服， 張必官奪，

翼必獲財， 軫必恒久， 角必安隱，

亢得美食， 氏必覩友， 房必益衣，

心必盜賊， 尾必壞爛， 箕必得病，

斗得美味， 女必得疾， 虛必得糧，

危必毒厄， 室必水厄， 壁必獲財，

奎必獲寶， 婁必增衣， 胃必減衣。

虛、奎、鬼、井、婁、畢、軫、角、亢、氏、房、翼、斗、壁、此以上宿、可裁縫衣著衣裳、餘並失。

三必祕要法

初九，畢(命)觜(榮)參(衰)井(安)鬼(危)柳(成)星(壞)張(友)翼(親)。
二九，軫(業)角(榮)亢(衰)氏(安)房(危)心(成)尾(壞)箕(友)斗(親)。
三九，女(胎)虛(榮)危(衰)室(安)壁(危)奎(成)婁(壞)胃(友)昂(親)。
三九法者，皆從本所屬宿為初九，第一命宿，依次第二為榮宿，第三衰宿，第四安宿，第五危宿，第六成宿，第七壞宿，第八友宿，第九親宿(即初九一行也)。

次第十宿，為二九行頭為業宿，第十一復為榮宿，第十二衰宿，第十三安宿，第十四危宿，第十五成宿，第十六壞宿，第十七友宿，第十八親宿(即是二九行了)。次第十九宿，即為三九行頭為胎宿，第二十為榮宿，第二十一衰宿，第二十二安宿，第二十三危宿，第二十四成宿，第二十五壞宿，第二十六友宿，第二十七親宿(即三九行了)。

此則是二十七宿，周而復始，是為三九之法。三九之法宿者祕要之術，所欲興事營求、入官拜職、移徙遠行，所為所作一一自看。從己身所屬宿，今日復是何宿，於三九中復善惡如何？與我本生宿，善惡相宜否？如是勘己，即看後占。

若榮宿日，即宜入官拜職、對見大人、上書表進獻君王、興營買賣、裁著新衣、沐浴及諸吉事並大吉。出家人剃髮、割爪甲、沐浴、承事師主、啟請法要並吉。

若安宿日，移徙吉，遠行人入宅、造作園宅、安坐臥床帳、作壇場並吉。

若危宿日，宜結交、定婚姻，歡宴聚會並吉。

若成宿日，宜修道學問、合和長年藥法，作諸成就法並吉。

若友宿日、親宿日，宜結交、定婚姻，歡宴聚會並吉。

若命宿日、胎宿日，不宜舉動百事。值業宿日，所作善惡亦不成就，甚衰。

若危壞日，並不宜遠行出、入移徙、買賣、婚姻、裁衣、剃頭、沐浴並凶。

若衰日，唯宜解除諸惡、療病。

若壞日，宜作鎮壓、降伏怨讎及討伐阻壞姦惡之謀，餘並不堪。

此所用三九法，於長行曆縱不是吉相，己身三九若吉，但用無妨。

又一說云：命宿、胎宿、危宿、壞宿，此宿日不得進路，及剃髮、裁衣、除爪甲並凶。

夫五星及日月陵犯守逼命、胎之宿，即於身大凶，宜修功德造善以禳之。若陵逼業宿者及榮、安、成、友、親之宿，即所求不遂，諸途迤坎，亦宜修福。福者，謂入灌頂及護摩，并修諸功德。如五星陵犯守逼衰、危、壞等宿，即身事並遂、所作稱心，官宦遷轉求者皆遂。如此當須問知司天者，乃知此年此月熒惑、鎮歲、辰星、太

白及日月等在何宿。以此知之，其法甚妙，宜細審詳也，以見至理。

宿曜曆經七曜直日曆品第八

夫七曜者，所謂日、月、五星下直人間，一日一易，七日周而復始。其所用，各各於事有宜者、不宜者，請細詳用之。忽不記得，但當問胡及波斯并五天竺人總知。尼乾子末摩尼，常以密日持齋，亦事此日為大日。此等事持不忘，故今列諸國人呼七曜如後。

日曜，太陽，胡名蜜，波斯名曜森勿，天竺名阿爾(泥以反)底耶(二合)。

月曜，太陰，胡名莫，波斯名婁禍森勿，天竺名蘇上摩。

火曜，熒惑，胡名雲漢，波斯名勢森勿，天竺名冀盎聲哦囉迦盎。

水曜，辰星，胡名啞(丁逸反)，波斯名掣森勿，天竺名部(引)陀。

木曜，歲星，胡名鶡勿，波斯名本森勿，天竺名勿哩訶娑跛底(丁以反)。

金曜，太白，胡名那歇，波斯名數森勿，天竺名戌羯羅。

土曜，鎮星，胡名枳院，波斯名翕森勿，天竺名賒乃以室折囉。

右件七曜，上運行於天、下直於人間，其精靈神驗，內外典籍具備。自南西北三方諸國一，太陽直日，月與軫合。太陰直日，月與畢合。火曜直日，月與尾合。水曜直日，月與柳合。木曜直日，月與鬼合。金曜直日，月與房合。土曜直日，月與星合。已上名甘露日，是大吉祥，宜冊立、受灌頂法、造作寺宇及受戒、習學經法、出家修道，一切並吉。

太陽直日，月與尾合。太陰直日，月與心合。火曜直日，月與壁合。水曜直日，月與昴合。木曜直日，月與井合。金曜直日，月與張合。土曜直日，月與亢合。已上名金剛峯日，宜作一切降伏法，誦日天子呪及作護摩，并諸猛利等事。

太陽直日，月與冒合。太陰直日，月與鬼合。火曜直日，月與翼合。水曜直日，月與參合。木曜直日，月與底合。金曜直日，月與奎合。土曜直日，月與柳合。已上名羅剎日，不宜舉百事，必有殃禍。

七曜占

太陽直日

其日宜冊命、拜官受職、見大人、教旗鬪戰申威，及金銀作、持呪、行醫、遊獵、放群牧，王公百官等東西南北遠行，及造福、禮

拜、設齋、供養諸天神，所求皆遂。合藥服食、割甲、洗頭、造宅、種樹、內倉庫、捉獲逃走、入學經官，理當並吉。其日不宜諍競作誓，行姦必。敗不宜先戰、不宜買奴婢。此日生者，足智端正、身貌長大，性好功德、孝順父母、足病短命。若五月五日得此曜者，其歲萬事豐熟。其日若日月蝕及地動者，其處萬物不生。

大陰直日

其日宜造功德，必得成就。作喜樂朋僚、教女人裁衣服、造家具、安坐席、穿渠、造堤塘、修井竈、買賣財物、倉庫內財、洗頭割甲、著新衣並大吉。

其日不嫁娶、入宅、結交，私情出行不問近遠行大凶。奴婢逃走難得、禁者出遲，殺生行惡、入賊者必凶。此日生者，多智美貌、樂福田、好布施、孝順。若五月五日遇此曜者，其年多疫疾，秋多霜冷，加寒。其日若日月蝕并地動，其轉無休息，至日月在時，未來世已來年月日亦然常轉無盡。

熒惑直日

其日宜決罰罪人、圍取盜賊、作誑事、買金寶、置牛羊群、動兵甲、修甲仗、教旗打賊、入陣必勝、姦盜者成、作誓何畏。宜出獵，先經官府者勝。宜種田及種菓木、調馬、療病合藥並吉。不宜下血者。其日成親、著新衣、洗頭割甲、入宅、結交，火下出財皆不吉。宜徵債，禁者難出、病者必重。其日生者，醜漏惡，性妨眷屬，便弓馬、能言語、勇決難養。若五月五日遇此曜者，其年多鬪諍，後兵賊、饒疫病、畜生死損。此日若有日月蝕及地動，其年多兵馬，傷者多死。

辰星直日

其日宜入學，及學一切諸工巧皆成，收債本利具獲、割甲剃頭、遠行者則宜伏怨敵。不宜修造宅舍、遇戰敵勿先鬪、看十問因必謾語、作誓並凶。被禁自出失物及逃走必獲。其日生者，饒病不孝、妨財物。長成已後財物自足、有智長命、能言語、有詞辯、得人畏敬。若五月五日遇此曜者，其年江水泛溢，百物不成，加寒。若此日日月蝕并地動，歲多飢儉。

歲星直日

其日宜冊命及求善知識并學論議、受法禮拜、造功德、布施、謁官、成親、交喜樂、入宅、著新衣、洗頭、宅內種菓木、修倉庫內財、調馬、買奴婢及嫁娶、內象馬、造宅，作諸事並吉。不宜作誓，作賊必敗，妄語爭競必凶。其日亡者，未得出埋。不宜祭亡人、弔死、問病。其日生者，宜與人養，長命成收之。長有智，心善，得大人貴重。於父母有相，錢財積聚。若五月五日遇此曜者，其歲萬物豐、四時調順。如此日日月蝕及地動，王公已下災厄。

太白直日

其日宜見大人及諸官長，洗頭、著新衣冠帶、成親、平章婚事、結交友、會朋流、置宅舍、逃走難得、勿畋獵并戰陣不吉。繫者出遲、生者短命、好善孝順，人皆欽慕。五月五日遇此曜者，人畜例驚失，必狂賊擾亂，候取良，從東擊勝。此日日月蝕及地動者，其歲足風，復有雷電，損多少田苗。

鎮星直日

其日宜修園圃、買賣田地、買口馬，宜合藥、伏怨家、放野燒、打牆作竈，一切事總合作。將入宅吉、舉哀葬吉。鞍馬上槽、內倉庫並吉。不宜結婚、作喜樂、服新衣及遠行。其日生，少病、足有聲名、樂善孝順、信於朋友。若五月五日遇此曜者，有土功，威重事。此日日月蝕及地動者，世界不安，威重人厄。

七曜直日與二十七宿合吉凶日曆

(曜與宿合者，假如正月十五日是軫宿，其忽是太陽直，即是好日。他皆倣此)。

一切皆悉用之。出入行來、用兵出陣、學藝及一切舉動，無不用其宿曜時日。唯東大唐一國，未審知委。其曜亦每日分為八時，平明即是所直之曜，乃至酉戌，則八時而周。夜亦分為八時，轉到明日曉時，即次後曜當直。如是細解，用之萬不失一。

釋大白所在八方天上地下吉凶法

凡有：

- | | | |
|----|-----|---------------|
| 一日 | 十一日 | 二十一日(大白 常在東方) |
| 二日 | 十二日 | 二十二日(常在東南) |
| 三日 | 十三日 | 二十三日(常在南方) |

四日 十四日 二十四日(常在西南)
五日 十五日 二十五日(常在西方)
六日 十六日 二十六日(常在西北)
七日 十七日 二十七日(常在北方)
八日 十八日 二十八日(常在東北)
九日 十九日 二十九日(常在中央入地)
十日 二十日 三十日(常在天上)

右太白，如上一月轉者，每月亦然，恒常隨天。年疫死後多虛耗，太白是鬪戰大將軍，常須順行，勿令逆之。若准人出入、移徙、遠行及嫁娶、拜官、鬪戰，世間雜事等造用行用，皆如上日時順行用者，大勝吉利。如逆行，不順此太白所在行法者皆凶，戰不勝，所有移徙、遠行等亦無利益。常須順之，凡舉事皆吉。

文殊師利菩薩及諸仙所說吉凶時日善惡宿曜經卷下

[CBETA 贊助資訊](https://www.cbeta.org/donation/index.php)

[.\(https://www.cbeta.org/donation/index.php\)](https://www.cbeta.org/donation/index.php)

CBETA 成立於 1998 年，於 2023 年 8 月 7 日轉型成為基金會。成立多年來，一部部佛典在嚴謹控管中轉換為數位典藏，不只數量龐大，而且文字校訂精確可信，又加新式標點方便閱讀。「CBETA 電子佛典集成」不僅獲得國際學界的重視及肯定，也成為大眾廣為運用的公共資源，如此成果都是在廣大信眾及有識之士的支持下才得以實現。

對一個從事佛法志業的非營利團隊，能夠長期埋首理想、踏實耕耘是非常不容易的。如今，CBETA 運作經費日漸拮据，但「佛典集成」仍有許多未竟之功。因此，懇請大家慷慨解囊、熱情贊助，讓未來有更多更好的電子佛典。

您的捐款本會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與 netiCRM 及 NewbPay 藍新金流合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

不管您持有的是國內或國外卡，所有捐款最終將以新台幣結算，所以我們所開立的捐款收據也將以新台幣計。

線上刷卡支持定期定額與單筆捐款。(銀聯卡不支援定期定額)

[前往捐款](#)

劃撥捐款

郵政劃撥帳號：5 0 4 6 8 2 8 5

戶名：財團法人佛教電子佛典基金會

欲指定特殊用途者，請特別註明，我們會專款專用。

線上信用卡 / PayPal 捐款

PayPal 是一個跨國線上付款機制的公司，CBETA 引用其服務，提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜，由於付款幣別為美元，我們除了會依您所贊助之美元金額開立收據外，另我們會依捐款當日公告匯率開立台幣收據，此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人佛教電子佛典基金會」。

For donations by check, please write the check to
"Comprehensive Buddhist Electronic Text Archive
Foundation".
